

古
今
釋
疑

古今釋疑卷之五目錄

安成

楊鍾竹審訂正

吳榮枋翁校閱

明堂制度

明堂配祭

祀后土

大雩

五帝

朝日夕月

六宗

祭四方

社稷

社稷配祭

祭地祭社之異

四望三望

封禪

高祿

蜡祭

五祀

類禡

古今釋疑卷之五

合山方中

明堂圖

<p>明堂圖 左 下</p>	<p>明堂圖 左 下</p>	<p>明堂圖 左 下</p>
<p>明堂圖 左 下</p>	<p>明堂圖 左 下</p>	<p>明堂圖 左 下</p>
<p>明堂圖 左 下</p>	<p>明堂圖 左 下</p>	<p>明堂圖 左 下</p>

明堂制度

論明堂之制者多矣。然諸儒所爭而不決者。不過二途而已。言五室者。則據考工記。是鄭玄輩所執也。言九室者。則案大戴禮。是蔡邕輩所持也。要皆各是其說。互相非毀。豈確論乎。考工記曰。夏后氏世室。五室九階。四旁有夾窻。殷人重屋。四阿。周人明堂。度九尺之筵。東西九筵。南北七筵。堂崇一筵。五室。凡室二筵。鄭注曰。此三者或舉宗廟。或舉王寢。或舉明堂。互言

之以明其同制。五室象五行也。木室於東北。火室於東南。金室於西南。水室於西北。土室於中央。九階。南面三。三面各二。此據明堂位。明堂。明政教之堂也。玉藻曰。

天子聽朔於南門之外。閏月則闔門左扉。立于其中。
鄭注曰。天子廟及路寢。皆如明堂制。明堂在國之陽。每月就其時之堂。而聽朔焉。卒事。反宿路寢。亦如之。閏月非常月。聽其朔於明堂門中。還處路寢。門終月。月令曰。天子孟春居青陽左个。仲春居青陽太廟。季

春居青陽右个。孟夏居明堂左个。仲夏居明堂太廟。
季夏居明堂右个。中央土。居太廟太室。孟秋居總章
左个。仲秋居總章太廟。季秋居總章右个。孟冬居立
堂左个。仲冬居立堂太廟。季冬居立堂右个。此呂不
韋之說。鄭氏謂每月就其時之堂。蓋據此也。大戴禮
曰。明堂古有之。凡九室。十二堂。室有四戶。八牖。共三
十六戶。七十二牖。以茅蓋屋。上圓下方。所以朝諸侯
其外有水。曰辟雍。在近郊三十里。應劭曰。黃帝曰。合
宮。有虞曰。總章。殷

曰陽館。周曰明堂。明堂八牕。法八風。四達。法四時。九室。法九州。十二堂。法十二月。三十六戶。法三十六旬。七十二牖。法七十二候。公玉帶曰。黃帝明堂中有一殿。四面無壁。茅蓋通水。水圜宮垣。爲複道。上有樓。從西南入。名昆侖。此卽所上漢武者也。康成曰。戴禮所云。似呂氏作春秋

時說者。蓋非古制也。蔡邕明堂月令章句曰。明堂者。天子太廟。所以祭祀。夏后氏世室。殷人重屋。周人明堂。享功養老。教學選士。皆在中。故言取正室之貌。則曰太廟。取其正室。則曰太室。取其堂。則曰明堂。取其四時之學。則曰太學。取其園水。則曰辟雍。雖名別而

實同。袁准正論。明堂宗廟太學。禮之本物也。事義不同。各有所爲。而世之論者。合以爲一體。取其詩書放逸之文。經典相似之語。推而致之。攷之人情。失之遠矣。宗廟之中。人所致敬。幽隱清淨。鬼神所居。而使衆學處焉。饗射其中。人鬼慢黷。死生交錯。囚俘截耳。以干鬼神。非其理也。茅茨采椽。至質之物。建日月。乘玉輅。以處其中。非其類也。夫宗廟鬼神所居。祭天而於人鬼之室。非其處也。王者五門。宗廟在一門之內。若

射在於廟。而張三侯。又辟雍在內。人物衆多。殆非宗廟之中。所能容也。北史李謐曰。考工記得之于五室。而謬于堂之修廣。大戴得之于戶牖。失之于九室。蓋明堂五室。古今通則。其室居中者。謂之太廟。太室之東者。謂之青陽。太室之南者。謂之明堂。太室之西者。謂之總章。太室之北者。謂之立堂。四面之室。各有夾房。謂之左右个。三十六戶。七十二牖矣。室个之形。今之殿前。是其遺象。个者。卽寢之房也。但明堂與寢。施

用既殊。故房个之名。亦隨事而遷耳。故驗之五室。則
義明於考工。校之戶牖。則數協於盛德。考之施用。則
事著於月令。求之閏也。合周禮與玉藻。既同夏殷。又
符周秦。雖乖衆儒。儻或在斯矣。新唐書禮樂志曰。明
堂自漢以來。諸儒之論不一。至于莫知所從。則一切
臨時增損。而不能合古。然推其本旨。要於布政交神。
爲王者尊嚴之居而已。其制作何必與古同。然爲之
者。至于無所據依。乃引天地四時。風氣乾坤。五行數

象之類。以爲倣象。而衆說亦不完成。隋無明堂。而季秋大饗。常寓雩壇。唐高祖太宗時。寓于圜丘。貞觀中。豆盧寬等。議從昆侖道。上層以祭天。下層以布政。而孔穎達以爲非。魏徵請爲五室重屋。上圓下方。上以祭天。下以布政。謂前世儒者。所言雖異。而以爲如此者多同。顏師古曰。周書叙明堂。有應門雉門之制。以此知爲王者之常居爾。其青陽總章。立堂太廟。左右个。皆路寢之名也。文王居明堂之篇。帶弓韜。禮高禘。

九門磔禴。國有酒以合三族。推其事。皆與月令合。則皆在路寢也。大戴禮曰。在近郊。又曰。文王之廟。奚足信哉。且門有臯庫。豈施于郊野。謂空近在宮中也。陳祥道禮書曰。天子路寢。見于書。惟東西房。東西夾。又東序西序。東堂西堂而已。則太廟路寢。無五室十二堂矣。鄭康成謂之明堂。太廟路寢。異實同制。非也。宗廟居雉門之內。而教學飲射於其中。則莫之容。處學者于鬼神之宮。享天神于人鬼之室。則失之。賔謂之。

明堂太廟辟雍同實。非也。彼蓋以魯之太廟。有天子
明堂之飾。晉之明堂。有功臣登享之事。乃有同實異
實之論。是不知諸侯有太廟。無明堂。特魯倣其制。晉
倣其名也。月令言明堂之制。則然矣。王者迎五氣。則
于東南西北之四郊。禮六神。則以蒼黃青赤白玄之
牲。玉象四時以巡。嶽順閏月以居門。而天地之間。罔
不欽若。則十二月之異堂聽政。不爲過也。其言四時
乘異輅。載異旂。衣異衣。用異器。則非也。夫車旗之類。

見于巾車司常。衣冠之等。見于弁師司服。皆無四時之異。禮運曰。五色十二衣。旋相爲質。鄭顓曰。王者隨天。自春徂夏。改青改絳。非古制也。朱子曰。明堂位與考工記。所記明堂之制度者。非出舊典。未敢必信也。竊意當有九室。如井田之制。東之中爲青陽太廟。東之南爲青陽右个。東之北爲青陽左个。南之中爲明堂太廟。南之東。卽東之南。爲明堂左个。南之西。卽西之南。爲明堂右个。西之中爲總章太廟。西之南。卽南

之西。爲總章左个。西之北。卽北之西。爲總章右个。北之中。爲立堂太廟。北之東。卽東之北。爲立堂右个。北之西。卽西之北。爲立堂左个。中是太廟太室。凡四方之太廟異方所。其左个右个。則青陽之右个。乃明堂之左个。明堂之右个。乃總章之左个也。總章之右个。乃立堂之左个。立堂之右个。乃青陽之左个也。但隨其時之方位開門耳。太廟太室。則每季十八日。天子居焉。古人制事。多用井田遺意。此恐是也。蓋明堂只

是三間九架屋耳。楊信齋曰。說者以明堂爲宗廟。又爲大寢。又爲大學。則不待辨說而知其謬矣。惟考工記謂明堂五室。大戴禮謂明堂九室。二說不同。前代欲建明堂者。往往惑於二說。莫知所決而遂止。愚謂五室取五方之義也。九室則五方之外而必備四隅也。九室之制。視五室爲尤備。然王者居明堂。必順月令。信如月令之說。則爲十二室可乎。此又不通之論也。惟朱子明堂圖。謂三間九架者。指五方四隅。凡有

九室之大畧而言之也。考工之言五室。象五行之方位。有五方。則有四隅。不言可知也。夫有五方四隅。則一堂之地。裂而爲九室矣。安得通而爲一。復有九筵之廣。七筵之修乎。蓋明堂云者。通明之堂也。所以朝諸侯。行王政者在是。所以享上帝。配祖考者在是。非七筵九筵之修廣。不能行也。五方四隅。亦惟辨其方。正其位。隨王者所居之日。掌次以帷幕幄帟爲文。以詔王居。以順月令。以奉天道耳。如朱子所謂隨其時。

之方位開門是也。履按諸儒所以辯者五室九室十二堂之不同。曾知五室卽九室九室卽十二堂。考工大戴月令未始異乎。一屋九架。謂之九室可也。九架五方。謂之五室可也。九架三楹。何不可各面呼爲三間。謂之十二堂可也。至辯明堂宗廟路寢異實同制。明堂太廟辟雍同實異名。此則不悟朝廟通稱。故分地安名旣失。而合爲一處亦非也。嘗聞之老父矣。廟者貌也。前廟後寢。古以前堂通謂之廟。後此乃分別

宗廟明堂之稱耳。禮天子無事不於廟中。以朝諸侯。若以廟爲宗廟之廟。木主在上。則天子永無負依南面之日矣。士禮迎於廟門外。卽廳事之門外也。所稱漸熟。故各執以爲常。古則猶通稱也。所謂明堂者。表嚮明而治之堂也。月令惟南曰明堂。豈非嚮明之謂乎。齊有泰山之明堂。猶行在所也。由是論之。祭祀之殿。亦可謂之明堂。朝會之軒。亦可謂之明堂。辟雍教士之宮。亦可謂之明堂。四阿九室。自然之理。其制大

同小異。隨時增損有之。以八八之方圖。合洛書之九宮。其論自確。畫州建國。井地制兵。莫不法之。上棟下宇。取諸大壯。豈有祀帝祀祖。明治興教之官。艸艸不合表法者哉。月令分居配位。大抵制器尚象之意。非必定如此也。

明堂配帝

祭法祖文王而宗武王。注曰。祭五帝五神於明堂。曰祖宗。祖宗通言爾。孝經曰。宗祀文王于明堂。以配上帝。月令春曰其帝太皞。其神句芒。夏曰其帝炎帝。其神祝融。中央曰其帝黃帝。其神后土。秋曰其帝少昊。其神蓐收。冬曰其帝顓頊。其神玄冥。疏曰。云祭五帝五神於明堂曰祖宗。祖宗通言爾者。以明堂月令五時。豈有帝及神。又月令季秋大饗帝。故知明堂之神。

有五人神。及五天帝也。孝經云。宗祀文王於明堂。以配上帝。故知於明堂也。又郊牲疏云。五時迎氣。及雩祭。則以五方人帝配之。九月大饗五帝。則以五人帝及文武配之。以文王配五天帝。則謂之祖。以武王配五人神。則謂之宗。崔氏曰。皆在明堂之上。祖宗通言。故祭法云。祖文王。文王稱祖。孝經云。宗祀文王於明堂。是文王稱宗。文王既爾。則武王亦有祖宗之號。故云祖宗通言。王肅駁鄭義曰。古者祖有功而宗有德。

祖宗自是不毀之名。非謂配食於明堂者也。審如鄭言。則經當言祖祀文王於明堂。不得言宗祀也。宗者尊也。周人既祖其廟。又祫共祀。孰謂祖於明堂者乎。鄭引孝經以解祭法。而不曉周公本意。殊非仲尼之義旨也。通典曰。宗祀文王於明堂。以配上帝。謂祀昊天上帝。先儒所釋不同。若以祭五帝。則以天帝皆坐明堂之中。以五人帝。及文王配之。五官之神。坐於庭中。以武王配之。通名曰祖宗。故云祖文王而宗武王。

文王爲父。配祭於上。武王爲子。配祭於下。如其所論。非爲通理。但五神皆生爲上公。死爲貴神。生存之日。帝王享會。皆須升堂。今死爲貴神。獨配於下。屈武王之尊。同下坐之義。爲不便。意爲合祭五帝於明堂。唯有一祭。月令所謂九月大饗帝于明堂也。五帝及神。俱坐於上。以文武二祖。汎配五帝。及五神而祭之。以文王配祭五帝。則謂之祖。以武王配祭五神。則謂之宗。明二君同配。故祭法云祖文王而宗武王。夫祖者。

始也。宗者尊也。所以名祭爲祖宗者。明祭之中有此二義。陳氏禮書曰。先王之於天。尊而遠之。故祀於郊。而配以祖。親而近之。故祀於明堂。而配以父。孝經曰。孝莫大於配天。又曰。郊祀后稷以配天。宗祀文王於明堂以配上帝。嚴父配天矣。又曰。配上帝者。天則昊天上帝也。上帝則五帝與天也。明堂不祀昊天上帝。不可謂配天。五帝不與。不可謂配上帝。以上帝爲昊天上帝耶。而周禮以旅上帝。對旅四望言之。則上帝

非一帝也。以明堂特祀昊天上帝耶。而考工記明堂有五室。則五室非一位也。月令之五人帝。五人神。所以配食四郊也。其與享明堂於經無見。又况降五神於庭中。降武王以配之。豈嚴父之意哉。然宗祀文王。則成王矣。成王不祀武王。而祀文王者。蓋於是時。成王未畢喪。武王未立廟。故宗祀文王而已。此所以言周公其人也。詩序曰。豐年秋冬報。則秋報者。季秋之於明堂也。冬報者。冬至之於郊也。先明堂而後郊者。

禮由內以及外也。先嚴父而後祖者。禮由親以及尊也。明堂之祀。於郊爲文。於廟爲質。故郊掃地藁秸而已。明堂則有堂有筵。郊特牲而已。明堂則維羊維牛。然郊有燔燎。而明堂固有升煙。漢武帝明堂禮畢。燎於堂下。古之遺制也。由漢及唐。或祀太一五帝。漢武或特祀五帝。光武或除五帝之坐。同稱昊天上帝。晉武帝除明堂五帝之坐。同稱昊天上帝。唐武帝各設一坐而已。後又復五帝位。或合祭天帝。唐武祭天帝於明。或配以祖。或配以群祖。漢武帝祠明堂。中宗仍之。或配以祖。或配以群祖。高皇帝對之。章

帝祠明堂以光武配。後又以高祖太
宗世宗中宗世祖顯祖配各一大牢。其服也。或以袞

冕。

東晉武帝

或以大裘。

梁

其獻也。或以一獻。或以三獻。

梁

昇曰。祀明改服大裘。又以貴質。不應三獻。請停三獻。止於一獻。隋於雩壇行三獻禮。抑又明堂

之制。變易不常。與考工之說不同。皆一時之制然也。

朱子曰。古者祭天於圜丘。掃地而行事。器用陶匏。牲

用犢。其禮極簡。聖人之意。以爲未足以盡其意之委

曲。故於季秋之月。有大享之禮焉。天卽帝也。郊而曰

天。所以尊之也。故以后稷配。后稷遠矣。配稷於郊。亦

所以尊稷也。明堂而曰帝。所以親之也。以文王配焉。文王親也。祀文王于明堂。亦以親文王也。尊尊而親親。周道備矣。然則郊者古禮。而明堂者周制也。周公以義起之也。楊氏曰。愚按郊祀配天。明堂配上帝。天與上帝一也。祀上帝禮。並如郊祀。然月令有大饗之文。我將之詩。有維羊維牛之語。則明堂之禮爲尤備。故程子曰。其禮必以宗廟之禮享之。朱子亦曰。祭於屋下。而以神祇祭之。蓋謂此也。又曰。按周人宗祀文

王于明堂以配上帝。上帝卽天也。配帝卽文王也。自漢以來。乃有並祭五帝之禮。鄭康成注祭法。祖文王宗武王之說。差誤特甚。至唐以來。遂有三帝並侑之禮。皆非古人制禮之本意矣。履按祖宗時。合祀天地于南郊之一壇。而加屋焉。則是泰壇明堂爲一制也。列聖相承。皆以太祖太宗配。是郊祀宗祀爲一體也。其亦義起之者歟。嘉靖十七年。始定明堂。徹南郊大祀殿爲大享殿。以祀皇天上帝。時大享殿未成。乃于

大內之玄極寶殿行禮。奉獻皇帝配焉。隆慶元年。禮部會議曰。明堂大享。每歲禁內之玄極寶殿。遣官行禮。未嘗親詣郊壇。况以睿宗配享。似于周人宗祀文王之義不協。遂罷之。而明堂之禮廢矣。

祀后土

曲禮。天子祭天地。疏曰。地神有二。歲有二祭。夏至之日。祭崑崙之神于方澤。一也。夏正之月。祭神州地祇于北郊。二也。或云。建申之月祭之。與郊天相對。左傳。凡祀啟蟄而郊。疏曰。鄭玄著書。多用讖緯。言地祇有二。唯鄭玄立爲此義。先儒悉不然。故王肅聖證論。引群書以證之。陳氏禮書曰。周禮。或言大示。或言地示。或言土示。蓋大示。則地之大者。地示。則凡地之示與

焉。土示則五土之示而已。禮記言兆於南郊。就陽位也。南郊祀天。則北郊祀地矣。祀天就陽位。則祭地就陰位矣。大宗伯以黃琮禮地。牲幣各放其器之色。而牧人陰祀。用黝牲。則牲有不同也。典瑞兩圭有邸。以祀地。則玉有不同也。大司樂奏太簇。歌應鍾。以祀地。示。凡樂函鍾爲宮。若樂八變。地示皆出。則樂有不同也。蓋先王之於神示。求之然後禮。禮之然後祀。函鍾爲宮。求之之樂也。太簇應鍾。祀之之樂也。若夫王之

黃琮兩圭。牲幣之黃黑。蓋祭有不一。而牲幣器亦從而異也。鄭氏之徒。謂夏至於方丘之上。祭崑崙之示。七月於泰折之壇。祭神州之示。此惑於讖緯之說。不可考也。凡以神位者。以冬至致天神人鬼。以夏日至致地示物彫。致天神而人鬼與之者。荀卿所謂郊則并百王於上天而祭之是也。郊天合百王。則郊地合物彫互矣。鄭氏謂致人鬼於祖廟。致物彫於壇墠。蓋用祭天地之明日。於經無據。又曰。古者正祭有常數。

非正祭者。無常時。故歲祭天者四。詩序曰。春夏祈穀于上帝。又曰。豐年秋冬報。則春祈穀。左氏所謂啟蟄而郊是也。夏祈穀。所謂龍見而雩是也。秋報。月令所謂季秋大享帝是也。冬報。周禮所謂冬日至於地上之圓丘是也。凡此正祭也。旅類造禱祠之屬。非正祭也。祭地之禮。周禮所謂夏日至於澤中之方丘。正祭也。禱祠之屬。非正祭也。然先王親地。有社存焉。禮曰。享帝於郊。祀社於國。又曰。郊所以明天道。社所以神

地道。又曰。郊社所以事上帝。又曰。明乎郊社之義。或以社對帝。或以社對郊。則祭社乃所以親地也。大宗伯以血祭社稷。又曰。大封先告后土。大祝大師大會同寮于社。又曰。建邦國。先告后土。則后土非社矣。鄭氏釋大宗伯。謂后土土神。黎所食者。釋月令。謂后土黎也。釋大祝。謂后土社神也。旣曰土神。又曰社神。是兩之也。書曰。敢昭告于皇天后土。左氏曰。君戴皇天而履后土。漢武帝祠后土於汾陰。宣帝祠后土於河

東。而宋梁之時。祠地皆謂之后土。則古者亦命地示爲后土矣。然周禮有大示。有地示。有土示。又有后土。則所謂后土者。非地示也。朱子曰。周禮有圓丘方澤之說。後人只言社卽后土。見於書傳。言郊社多矣。看來亦自有方澤之祭。楊氏曰。愚按大司樂奏太簇歌應鍾舞咸池以祭地示。鄭注云。地示所祭於北郊及社稷。牧人陰祀。用黝牲毛之。鄭注云。陰祀祭地北郊及社稷。夫祭地惟有夏至北郊方澤之禮。此外則有

社祭亦祭地也。鄭氏亦既知之矣。及注曲禮。天子祭
天地。大宗伯黃琮禮地。典瑞兩圭祀地。又云。地神有
二。歲有二祭。夏至祭崑崙之神於方澤。夏正祭神州
之神於北郊。何也。蓋祭地惟北郊及社稷。此三代之
正禮。而釋經之正說。鄭氏所不能違也。有崑崙。又有
神州。有方澤。又有北郊。析一事以爲二事。此則惑於
緯書。而牽合聖經以文之也。知有正禮。而又汨之以
緯書。甚矣其惑也。履按通典則依鄭氏注。以方丘爲

祭崑崙之神。丘在國之北。禮神之玉以黃琮。牲用黃

犢。幣用黃繒。

所謂各如其器之色。

王及尸同服大裘。配以后稷。

服與配。經文不載。注家以爲同祭天之禮。故服大裘。配后稷。

其樂則大司樂之函

鍾爲宮。至八變。則地祇皆出。可得而禮是也。神州地

祇。則爲壇於北郊。名泰折。玉用兩圭。五寸有邸。牲用

黝犢。幣用黑繒。

幣經無文。據牲用黑。知當從其色。

配亦以后稷。其樂

則奏太簇。歌應鍾。舞咸池。以祭地示是也。宋政和四

年。禮制局言祭祀。始則求神而禮之。終則正祭而祀

焉。大宗伯以黃琮禮地。蓋施于求神之時也。與大司樂以函鍾爲宮。至地示皆出。可得而禮。同矣。典瑞兩圭有邸以禮地。蓋施于薦獻時。與大司樂奏太簇歌應鍾舞咸池以祭地。同矣。鄭氏乃謂以黃琮禮地神之在崑崙者。兩圭有邸以祀地祇于北郊神州之神。且黃琮兩圭有邸。周官特言禮地祀地而已。初無崑崙神州之別也。馬端臨曰。按鄭氏解經。於天地之祀。皆分而爲二。是有二天二地矣。然古人祀天之祀。郊

與明堂本二處。所配之祖又不同。則因宗祀文王於明堂。以配上帝一語。而指其帝爲五精之神。感生之帝。猶云可也。至於祭地。則經文所載。惟方澤而已。乃以爲此所祀者崑崙。而又有神州。則祭之於北郊。蓋北郊之名。亦出緯書。孝經緯。祭地示於北郊。禮經所不載。於是

又因祭法有泰折之語。而以爲泰折卽北郊。又非方澤也。其支離不通。彌甚矣。履按鄭氏之說。曹魏始遵用之。鄭說祀天。則有昊天有五帝。而魏圓丘所祀。曰

皇皇帝天。南郊所祀。曰皇天之神。鄭說祀地。則有崑崙。有神州。而魏方澤所祀。曰皇皇后地。北郊所祀。曰皇地之祇。徃徃見靈威仰。及崑崙等名不雅馴。故有以易之。然不知皇天之與天神。后土之與地祇。果可分而爲二乎。迄北齊始用崑崙神州之名。而神州猶是從祀。唐開元二十一年。遂以立冬。別祭神州矣。宋則因之。至明乃革。

大雩

雩有二。有孟夏大雩。有因旱而雩。鄭氏曰。雩。吁嗟求雨之祭也。雩祭。謂爲壇南郊之旁。雩五精之帝。通典曰。建巳月。雩五方上帝。其壇名曰雩禋。雩。祭旱也。禋。祭水也。於

南郊之傍。命樂正習盛樂。舞皇舞。楊信齋曰。按左傳。啟蟄而郊。龍見而雩。此詩頌所謂春夏祈穀于上帝也。龍見而雩。與周禮所掌。春秋所書不同。周禮司巫。帥巫而舞雩。爲旱而雩也。春秋書雩二十有一。因旱

而雩也。龍見而雩。乃建巳之月。萬物始盛。待雨而長。聖人爲民之心切。遂爲百穀祈膏雨。與啟蟄而郊之意同。是以樂則必用盛樂。與它祭異。聲音之號。所以詔告于天地之間。以達神明也。郊非不用樂也。以禮爲主。雩非不用禮也。以樂爲主。各隨其宜也。但鄭註言雩五精之帝。疏言春夏秋冬共成歲功。則不可偏祭一帝。其言似矣。然天一而已。因時迭王。則有五帝之名。易曰帝出乎震是也。祭于四郊。則有五帝之位。

小宗伯兆五帝于四郊是也。鄭氏謂夏雩。總祭五帝。是一天而有五祭。祭于南郊乎。抑兼祭于四郊乎。其義何居。陳氏禮書曰。春秋書雩二十有一。皆在七月以後。左氏曰。龍見而雩。過則書。蓋龍見建巳之月。而建巳乃陽盛之時。陰氣所以難達也。故雩祀作焉。過此而後雩。此春秋所以譏也。故穀梁曰。秋大雩。非正也。冬大雩。非正也。祭法有雩祭之壇。春秋之時。魯以南門爲雩門。先儒皆以魯之舞雩在城南。鄭氏曰。雩

爲壇于南郊之傍。其說蓋有所受也。履按自鄭氏之說行。諸儒莫之能決。有雩祀五方上帝五人帝五宮于南郊者。如唐貞觀禮是也。有雩祀昊天上帝于圜丘者。如唐顯慶禮是也。及開元中。王仲丘奏祀昊天上帝于圜丘。尊天位也。然雩祀五帝既久。請二禮並行。以成大享帝之義。旣祀昊天上帝。又祀五帝。是猶明堂並祀上帝五帝之誤也。且雩祀上帝。必升煙。後世乃謂用火不可以祈水。而爲坎以瘞。就陽不可以

求陰而移壇于東。

梁禮

雩必自郊徂宮。後世或祈山林

川澤。羣廟百辟卿士。然後及于上帝。

亦梁禮也。北齊及唐皆然。

雩

樂以舞爲盛。後世或選善謳者。歌詩而已。

北齊禮。

皆非

古也。明嘉靖中。始建崇雩壇于圓丘之旁。以祀天禱

雨。歲旱。則于季春之末。禮部奏請行禮。蓋二雩合而

爲一。所謂大雪者。猶大旅大饗。而吳幼清孫明復胡

康侯皆云。春秋書大雪。乃惡其僭天子之禮。故特謂

之大誤矣。

五帝

馬貴與曰。按五帝之祀。見於周禮。五帝之義。見於家語。其說本正大也。自秦漢間廢祀天之禮。而以所謂郊祀者。祀於五時。名曰五帝。鄭康成解經。習聞秦漢之事。遂於經所言郊祀。多指爲祀五帝。且據緯書爲之名字。東曰靈威仰。南曰赤熛怒。西曰白招拒。北曰汁光紀。中曰含樞紐。於是王子雍群儒。引經傳以排之。而謂五帝者。太皞炎帝黃帝少皞顓頊五人帝也。

先儒楊信齋則謂果以五人帝爲五帝則五人帝之前其無司四時者乎。鄭則失矣。王亦未爲得也。其說善矣。然楊氏之釋五帝則以爲如毛公所謂元氣昊大謂之昊天。遠視蒼蒼謂之蒼天。程子所謂以形體謂之天。以主宰謂之帝之類。則五帝乃天之別名而已。則曰帝可矣。何必拘以五。又何必於祀上帝之外。別立祀五帝之禮乎。蓋五帝者五行之主而在天。猶五嶽爲五行之鎮而在地也。五帝不出於天之外。而

謂五帝卽昊天。則不可。五嶽不出於地之外。而謂五嶽卽后土。亦不可。家語所言盡之矣。今因疑緯書靈威仰等名字。而謂五帝之本無。因疑五帝之本無。而謂家語之非聖言。亦過矣。如日月星宿。風伯雨師。皆天神之見於祀典者。經傳所言昭昭也。而道家者流。則以爲各有名稱。甚者或爲之姓字。其妖妄不經。甚於緯書。儒者所不道也。然因是而疑日月諸神之本無。可乎。

朝日夕月

通典曰。凡祭日月。歲有四焉。迎氣之時。祭日于東郊。祭月于西郊。一也。二分祭日月。二也。祭義云。郊之祭。大報天。而主日。配以月。三也。月令。十月祭天宗。合祭日月。四也。但四時之氣。有分有合。二分之日祭。謂分也。大報天而主日。以月配之。是合也。大報配祭之時。日燎于壇。月埋于坎。瘞埋之時。自血始。燔燎之時。自氣先。合爲大祭。分爲中祭。特牲云。大報天而主日。其

禮。宐重。用犢。分祭。宐輕。輕則用少牢。拜日于東郊。禮
司于西郊者。此因而祭于郊也。特牲大報之時。掃地
而祭。燔柴而郊。就陽位也。祭法分祭之時。王宮祭日。
夜明祭月。以少牢。在壇上不于地也。陳氏禮書曰。古
者之祀日月。其禮有六。郊特牲曰。郊之祭。大報天而
主日。配以月。一也。玉藻曰。朝日于東門之外。祭義曰。
祭日于東。月于西。二也。大宗伯四類於四郊。兆日于
東郊。兆月于西郊。三也。大司樂樂六變而致天神。月

令孟春祈來年于天宗。天宗者。日月之類。四也。覲禮。拜日于東門之外。反祀方明。禮日于南門外。禮月于北門外。五也。左傳。雪霜風雨之不時。於是乎禋之。六也。夫因郊蜡而祀之。非正祀也。類禋而祀之。與覲諸侯而禮之。非常祀也。春分朝之于東門之外。秋分夕之于西門之外。此祀之正與常也。日言朝。則于日出之朝朝之也。月言夕。則于月出之夕夕之也。楊氏曰。愚按典瑞朝日注云。天子當春分朝日。秋分夕月。玉

藻朝日于東門之外。注云。朝日于春分之時。馬融鄭康成皆同此說。賈誼亦曰。三代之禮。春朝朝日。秋暮夕月。所以明有敬也。蓋冬至祭天。夏至祭地。此祭天地之正禮也。春分朝日。秋分夕月。此祭日月之正禮也。所謂兆日于東郊。兆月于西郊。祭日于壇。祭月于坎。祭日于東。祭月于西。王宮祭日。夜明祭月。卽春分朝日。秋分夕月之事也。此外則因事而祭。如大報天而主日配以月。此因郊而祭也。覲禮拜日于東門之

外。禮日于南門外。禮月于北門外。此因覲禮而行用也。月令祈來年于天宗。此因蜡而祈也。日月星辰之神。則雪霜風雨之不時。於是乎禋之。此因禋而祭也。履按漢武帝因郊泰畤。朝出行宮。東向揖日。其夕西向揖月。則失東西郊之禮也。魏文帝正月祀日于東門之外。則失春分之禮也。時薛靖論曰。按周禮朝日無常日。鄭玄云。用二分。秋分之時。月多東昇。西向拜之。背實遠矣。朝日空用仲春之朔。夕月空用仲秋之

冊。此尤無據。齊何佟之曰。王者兄日姊月。馬鄭用二分。盧植用立春。佟之以爲日者。太陽之精。月者。太陰之精。春。陽氣方永。秋分陰氣向長。天地至尊。故用其始。而祭以二至。日月次天地。故祭以二分。則融與康成得其義矣。後周于東門外爲壇以朝日。燔燎如圓丘。于西門外爲壇于坎中。方四丈。深四丈。以夕月。燔燎如朝日。隋唐宋壇坎之制。廣狹雖與後周差異。大槩因之而已。明初于大祀殿丹墀中。壘土爲臺。東

西相向。以祀日月。罷朝日夕月之祭。至嘉靖九年。用夏言議。始改建四郊。兆日于東郊。兆月于西郊。用二分行禮。朝日壇以甲丙戊庚壬。間歲一親祭。夕月壇以丑辰未戌。三歲一親祭之。

六宗

尚書禋于六宗。諸儒訓釋。互有異

春秋正義 卷之五 六宗 劉歆

以爲易六子。水火雷風山澤也。伏生與馬融以爲天地四時。梁崔靈恩取之。賈逵以爲天宗三。日月星也。地宗三。河海岱也。歐陽及大小夏侯說尚書云。所祭者六。上不及天。下不及人。飭不及四方。居中央恍惚。助陰陽變化。有益于人者也。李邵取之。古尚書說日月爲陰陽宗。北辰爲星宗。岱爲山宗。河爲水宗。海爲

古今考索卷八
澤宗。鄭玄以六宗言禋。與祭天同名。則六者皆是天之神祇。謂星辰。司中。司命。風師。雨師。星。謂五緯也。辰。謂日月所會十二次也。司中。司命。文昌第五第四星也。風師。箕也。雨師。畢也。孔叢子取祭法四時。寒暑。日月。星。水旱。爲六親宗。孔安國因之。王肅取家語之文。與孔注同。肅又以爲六子之卦。劉劭言萬物負陰而抱陽。中氣以爲和。六宗者。太極中和之氣。爲六氣之宗也。摯虞以爲月令孟冬。天子祈來年于天宗。天宗。

六宗之神也。虞喜別論曰。地有五色。太社象之。總五爲一。則成六。六爲地數。推校經句。闕無祭。則祭地也。劉昭以爲此說近得其實。張廌以爲六代帝王。張髦以爲祀祖考。所尊者六。三昭三穆是也。王安石取之。司馬彪云。天宗者。日月星辰寒暑之屬也。地宗。社稷五祀之屬也。四方之宗。四時五帝之屬也。後魏高閭以天皇帝。及五帝爲六宗。杜佑取之。朱子書說。則取祭法。履聞之老父曰。尚書本文。上言上帝。下言山

川群神。此似爲地太社之說近之。然一六太虛無據也。常以五方有六神。東方少昊之子曰重。爲勾芒。南方顓頊之子曰黎。爲祝融。西方少皞之子曰該。爲蓐收。北方少皞之二子曰修。曰熙。爲玄冥。中央共工氏之子曰勾龍。爲后土。此較諸家爲確矣。蓋五行而二水也。

祭四方

曲禮。天子祭四方。歲徧。諸侯方祀。歲徧。鄭康成注曰。祭四方。謂祭五方之神於四郊也。勾芒在東。后土祝融在南。蓐收在西。玄冥在北。詩云。來方禋祀。方祀者。各祭其方之官而已。周禮。舞師教羽舞師而舞四方之祭祀。注曰。四方。謂四望也。大司馬秋祭祫。注曰。祫。爲方聲之誤。當是祭四方之神。大宗伯以醯辜祭四方百物。注從先鄭之說曰。四方百物。八蜡也。祭法四

坎壇祭四方也。注曰。四方。謂山林川谷丘陵之神也。月令。季秋祭禽于四方。注曰。四方。謂四方五行之神也。陳氏禮書曰。邕人叙四方在山川之下。大司樂叙四望在山川之上。則四方非四望也。舞師教羽舞師而舞四方之祭祀。鼓人凡祭祀百物之神。鼓兵舞帔舞者。則四方非百物也。五官之說。亦不可考。大司馬於社言祭。則地示也。於初烝言享。則人鬼也。於方言祀。蓋兼上下之神也。楊信齋曰。詳考諸說。惟四望爲

近。蓋四方卽四望。而又有不同。四望者。郊祀之後。合四方。名山大川之神。而望祭之。如左氏曰。望。郊之屬是也。四方者。各望祭於其方。如天子祭四方。歲徧是也。通而言之。則同時合祭四方。謂之望。四時各祭於其方。亦謂之望。如舜卽位。同時告祭。曰。望于山川。歲二月。東巡狩。亦曰。望秩于山川。是也。諸侯方祀。亦云歲徧。何也。諸侯之國。雖居一方。然國內又有東西南北。亦隨四時而望祭於其方也。望祭四方。則五官之

神。五行之神。及山林川澤之神。皆在其中矣。固不可
又分而爲四也。大宗伯以鬯辜祭四方百物。亦謂之
四方。何耶。按以血祭。祭五岳。以鬯辜祭四方百物。禮
固不同。所謂祭四方百物。言祭四方之內。百物之神
耳。鼓人鼓兵舞帗舞。疏云。百物之小神是也。非祭四
方也。

東方青色。南方赤色。西方白色。北方黑色。上冒以黃土。建諸侯。則割其方色土與之。使立社。燕以黃土。直以白茅。茅取其潔。黃取王者覆四方也。陳氏禮書曰。社所以祭五土之示。稷所以祭五穀之神。五穀之神。而命之稷。以其首種先成。而長百穀故也。稷非土。無以生。土非稷。無以見生生之効。故祭社必及稷。以其同功均利。而養人故也。祭法王社侯社。無預農事。故不置稷。大社國社。則農之所報在焉。故皆有稷。先儒

謂王社。或建於太社之西。或建於籍田。然國語王籍則司空除壇。農正陳籍禮。而歷代所祭。先農而已。不聞祭社也。故詩曰。春籍田而祈社稷。非謂社稷建於籍田也。其言王社建于太社之西。于義或然。先儒謂天子社廣五丈。諸侯半之。天子社五色。冒以黃。而諸侯受土。各以其方之色。亦冒以黃。其言雖不經見。然五土數。黃土色。則天子社廣五丈。冒以黃。信矣。諸侯之禮。常半天子。天子六軍。諸侯三軍。天子六卿。諸侯

三卿。天子六宮。諸侯三宮。天子辟雍。諸侯泮宮。天子之馬十二閒。諸侯之馬六閒。則社半五丈。信矣。禹貢徐州貢土五色以爲社。則大社五色。諸侯受土。各以其方之色。信矣。又曰。大夫以下。其社之大者。則二千五百家爲之。周禮所謂州社是也。其小則二十五家亦爲之。左傳所謂書社千社是也。鄭氏謂百家以上共立一社。若今時里社。此以漢制明古也。左傳有清丘之社。月令仲春命民社。先儒以謂自秦以下。民始

得立社。然禮大夫以下。則民社不始於秦。履按旣立太社。又立王社。各有其義。而周禮祭社稷。春祈秋報。禮物樂舞。未嘗有二社之分。漢魏而後。皆立二社一稷。漢曰官社。魏曰帝社。蓋倣祭法王社也。而漢平帝。唐睿宗。復立官稷帝稷。蓋倣王社之稷也。雖倣周制。究未明並立二社之義。魏孔晃曰。祭法王爲羣姓立社曰太社。言爲群姓下及士庶。皆使立社。非自立也。今並立二社。一神二位。同時俱祭。於事爲重。於禮爲

黷。劉喜曰。祭法爲群姓立社。若如晁議。當言王使。不得言爲。下云王爲群姓立七祀。諸侯自爲立五祀。若使群姓私立。何得踰于諸侯而祭七祀乎。晉傳咸曰。穀梁傳云。天子親耕。故自立社。爲籍而報也。國以人爲本。人以穀爲命。爲百姓立社而祈報焉。事異體殊。此社之所以有二。王肅曰。王社亦謂春祈籍田。秋而報之也。太社則王者布下圻內。爲百姓立之。不自立之于京師也。景侯此論。據祭法大夫以下成群立社。

曰置社。景侯解曰。今之里社。是太社。天子爲人而祝。故稱天子社。郊特牲曰。天子大社。必受霜露風雨。夫以群姓之衆。王者通爲立社。故稱太社。若夫里社。其數不一。蓋以里所爲名。左氏傳盟于清丘之社是也。人間之社。不稱太矣。若不立之京師。當安所立乎。明興。惟建大社大稷壇于午門外之右。同壇同墼。用五色土。隨方築之。埋石主于壇之正中。微露尖于外。祭時奉大社神牌居東。大稷神牌居西。俱北向。歲仲春。

秋擇上旬日行禮。禮時爲大。固不必倣周之王社。而立帝社。帝稷也。祝欽明以先農爲帝社。齊武帝以太稷爲稷社。豈非臆說乎。且使帝社南向。太社及稷並東向。殊失北牖答陰之義。而齋宮在帝壇北。西向於神背行禮。其乖禮甚矣。

社稷配祭

祭法厲山氏之有天下也。其子曰農。能殖百穀。夏之
衰也。周棄繼之。故祀以爲稷。共工氏之霸九州也。其
子曰后土。能平九州。故祀以爲社。左傳蔡墨曰。共工
氏有子曰勾龍。爲后土。后土爲社稷。田正也。有烈山
氏之子曰柱。爲稷。自夏以上祀之。周棄亦爲稷。自商
以來祀之。賈逵鄭玄皆云烈山炎帝之號。杜預言是神農世諸侯。國語左傳皆云其子曰柱。祭法云其子曰農。劉炫云蓋柱是名。其官曰農。郊特牲疏曰。社稷之義。先儒

所解不同。鄭康成之說。以社爲五土總神。稷爲原隰之神。勾龍以有平水土之功。配社祀之。稷有播種之功。配稷祀之。鄭必爲此說者。按郊特牲云。社祭土而主陰氣。又云。社所以神地之道。又禮運云。命降于社之謂殽地。又王制云。祭天地社稷。爲越紼而行事。據此諸文。故知社卽地神。稷是社之細別。名曰稷。稷乃原隰所生。故以稷爲原隰之神。若賈逵馬融王肅之徒。以社祭勾龍。稷祭后稷。皆人鬼也。非地神。故聖證

論王肅難鄭云。禮運云。祀帝於郊。所以定天位。祀社於國。所以列地利。社若是地。應云定地位。而言列地利。故知社非地也。爲鄭學者。馬昭之等。通之云。天體無形。故須云定位。地體有形。不須云定位。故唯云列地利。肅又難鄭云。祭天牛角。繭栗而用特牲。祭社牛角尺。而用太牢。又祭天地。大裘而冕。祭社稷。絺冕。又唯天子令庶民祭社。社若是地神。豈庶民得祭地乎。爲鄭學者。通之云。以天神至尊。而簡質事之。故牛角

蕭栗而用特牲。服大裘。天地至尊。天子至貴。天子祭社。是地之別體。有功於人。報其載養之功。故用太牢。貶降于天。故角尺也。祭用絺冕。取其陰類。庶人蒙其社功。故亦祭之。非是方澤之地也。肅又難鄭云。召誥用牲于郊。牛二。明后稷配天。故知二牲也。又云社于新邑。牛一。羊一。豕一。明知唯祭勾龍。更無配祭之人。爲鄭學者通之云。是后稷與天尊卑既別。不敢同天牲。勾龍是上公之神。社是地祇之別。尊卑不甚懸絕。

故云配同牲也。肅又難鄭云。后稷配天。孝經有配天明文。后稷不稱天也。祭法及昭二十九年傳云。勾龍能平水土。故祀以爲社。不云祀以配社。明知社卽勾龍也。爲鄭學者通之云。后稷非能與天同功。唯尊祖配之。故云不得稱天。勾龍與社同功。故得云祀以爲社。而得稱社也。肅又難云。春秋說伐鼓于社。責上公。不云責地祇。明社是上公也。又月令命民社。鄭注云。社。后土也。勾龍爲后土。鄭旣云社后土。則勾龍也。是

鄭自相違戾。爲鄭學者通之云。伐鼓責上公者。以日食臣侵君之象。故以責上公言之。勾龍爲后土之官。其地神亦名后土。故左傳云。君戴皇天而履后土。地稱后土。與勾龍稱后土。名同而實異也。鄭注云。后土者。謂地神也。非謂勾龍。故中庸郊社之禮。注云。社祭地也。又鼓人云。以靈鼓鼓社祭。注云。社祭。祭地祇也。是神爲地祇也。朱子曰。或說稷是丘陵原隰之神。或云穀神。看來穀神較是。社是土神。又問曰。社如何有

神曰。能生物。便是神也。楊氏曰。王鄭之學。互有得失。若鄭云。勾龍有平水土之功。配社祀之。后稷有播種之功。配稷祀之。則鄭說爲長。履按。洪武中。乃罷勾龍。后稷之配。而以仁祖配。仁宗卽位。又奉文皇帝配。蓋起于張燾之議也。

祭地祭社之異

胡居仁曰。古者祭地于社。猶祀天于郊也。故泰誓曰。郊社不修。而周公祀于新邑。亦先用二牛于郊。後用太牢于社也。記曰。天子將出。類于上帝。宐于社。又曰。郊所以明天道。社所以神地道。周禮以禋祀祀昊天上帝。以血祭祭社稷。而別無地祇之位。四圭有邸。舞雲門以祀天神。兩圭有邸。舞咸池以祀地。而別無祭地之說。則以郊對社。可知矣。後世旣立社。又立北郊。

失之矣。黃澤曰。社以享水土穀之神。而配以勾龍稷。非祭地也。禮天子諸侯群姓百姓大夫及庶民皆立社。故有王社侯社大社國社置社之名。其名義高下不同如此。而謂之大示之祭可乎。殷革夏周革殷皆屋其社。是辱之也。旱乾水溢則變置社稷。是責之也。王者父事天母事地而可責可辱乎。周禮王祭社稷五祀則絺冕以社稷下同五祀而用第五等之服不得與先王先公四望山川比。則社非祭地明矣。傳曰。

戴皇天履后土。楚后土卽地也。周禮大祝大封。先告后土。大師旅大會同。宐于社。又建國。先告后土。則后土非社矣。舜典類于上帝。禋于六宗。望于山川。六宗者。上下四方之神。卽五天帝及地也。故其祀在上帝之次。山川之前。周禮四望。與五帝同兆于郊。又與祀地同玉。又與山川同祭服。則四望者。祀地之四方也。又有分樂所祭五土之示。祭地之禮。不止于方澤矣。而欲以社當之。可乎。周禮以圉丘對方澤。以天神對

地示。以蒼璧禮天。對黃琮禮地。以祀天。旅上帝。對祀地。旅四望。書及禮記。乃多以郊對社。蓋郊祀上帝。社祭水土之神。其禮專。圜丘方澤。徧祭天神地示。其意廣遠。分爲四祀明矣。天地之道。高深玄遠。大神大示。不可煩瀆。故歲事祈之於郊。而水土之變。則責之於社。此古人立祀深意也。胡氏家學。不信周禮。故率意立說如此。

四望三望

陳氏禮書曰。天子四望。達於四方。魯三望。泰山河海而已。書曰。海岱及淮。惟徐州。諸侯之望。皆其境內之名山大川也。望雖以名山大川爲主。而其實兼上下之神。故詩於柴望。言懷柔百神。及河喬嶽。周禮於望。皆言祀而不言祭。又典瑞四望。與山川異玉。大司樂四望。與山川異樂。左氏曰。望。郊之細也。又曰。望。郊之屬也。公羊曰。方望之事。無所不通。則望兼上下之神。

可知矣。鄭司農釋大宗伯曰。四望。日月星海。杜預釋左傳曰。望。祀分野之星。及封內山川。許慎曰。四望。日月星辰。河海大山。其說蓋有所受之也。鄭康成釋大宗伯曰。四望五嶽四瀆。釋大司樂。又兼之以司中司命。風伯雨師。釋舞師。又以四望爲四方。其言異同。不可考也。望之禮有二。而其用不一。男巫掌望祀望衍。鄭氏讀衍爲延。謂望祀有牲與粢盛。望衍用幣致神而已。然鄭氏於大祝衍祭。亦以爲延祭。禮文殘缺。不

可考也。望祀或設於郊天之後。或設於巡狩之方。或旅於大故之時。則望有常有不常之祀也。崔靈恩謂四望之祭。歲各有四。不知何據然也。楊氏曰。愚按四望之說。惟鄭氏注小宗伯云。四望五嶽四鎮四瀆。其說爲是。蓋言望祭天下之名山大川也。所謂懷柔百神者。言合祭四方名山大川之神。故云百神。非必兼上下之神也。舜卽位類于上帝。禋于六宗。望于山川。徧于群神。類也。禋也。望也。各是一事。望非兼上下之

神可知也。馬端臨曰：按古者天子祭四望，五嶽四瀆，其大者也。然王畿不過千里，千里之外，則皆諸侯之國。所謂岳瀆，豈必在畿內而後祭之？如舜都蒲坂而一歲巡五嶽，俱有望秩之禮是也。始皇雖併六國而禮典廢墜，所祠祭山川皆因其游觀所至處，與封禪求仙則及之。而其領之祠官以歲時致祭，且雜以淫祠者，大率多秦中山川也。至漢則名山大川之在諸侯國者，不領于天子之祠官，必俟齊淮南常山之國。

之前。世質民淳。安得泥金檢玉。結繩而治。安得鐫文告成。妄亦甚矣。若聖主不須封禪。若凡主不應封禪。秦始皇嘗封泰山。孫皓嘗封國山。皆由主好名于上。而臣阿旨于下。非盛德之事。不可爲法也。胡寅曰。封禪之事。漢唐之君。往往行之。曾無一人建議明白。如許懋者。賢哉懋乎。其學可謂正矣。漢唐以來。緯書行而經學弛。重以鄭玄。博聞寡要。不知折衷于聖人。而惟緯書之信。世無稽古大儒。稽古言以祛群惑。遂使

有天下者。於無事時。肆其侈心。千乘萬騎。巡狩侈費。登山琢石。夸大功德。或有秘祝。以祈不死。取笑當代。貽譏後來。彼梁武之資。未必如漢光武之英也。一聞懋言。遂遏欲行之意。而光武讀河圖會昌符。乃詔梁松按索讖文。則不及梁武遠矣。履按司馬彪崔靈恩袁宏等。亦皆論封禪之非。然不過以爲功德不盛。不可登封。繼世之君。不聞改封。玉牒石函。不合古禮而已。故前世論者。莫善于許懋也。嘗歎韓愈儒者。身任

周孔之道。而潮州謝表。乃請憲宗封神。俸以貶竄。遂
進諛言。又何怪乎王欽若蔡京小人輩之媚其上乎。

高禰

月令曰。仲春玄鳥至。至之日。以太牢祠于高禰。注曰。玄鳥以施生時。來巢人堂宇。而孚乳。嫁娶之象也。媒氏之官。以爲候。高辛氏之世。玄鳥遺卵。簡狄吞之。而生契。後王以爲媒官嘉祥。而立其祠焉。變媒爲禰。神之也。疏曰。按蔡邕以爲禰神。是高辛已前舊有高者。尊也。謂尊高之禰。不由高辛氏而始有高禰。又生民及玄鳥毛詩傳云。姜嫄從帝而祈于郊禰。則是姜嫄

簡狄之前。先有禰神矣。而此注立高辛氏爲禰神。是高辛氏已前。未有禰神。參差不同也。朱子生民詩集傳曰。古者立郊禰。蓋祭天於郊。而以先媒配也。其禮以玄鳥至之日。用太牢祀之。姜源出祀郊禰。見大人跡而履其拇。遂歆歆然如有人道。而震動有娠。乃周人所由以生之始也。楊氏曰。高禰事。當以毛傳及朱子集傳爲正。宋高宗時。禮部言竊詳生民之詩。言履帝武敏歆。先儒以敏爲拇。謂姜源履巨跡之拇。以歆

郊禘之神。是生后稷。以爲從帝嚳祀禘神之應。其說頗附會玄鳥生契之意。如詩言繩其祖武。傳言夫子步亦步。趨亦趨。皆繼踵相因循之意。履帝武敏歆。猶言帝嚳行禘祀之禮。姜源踵而行之。疾而不遲。故上帝所歆。居然生子。以見視履考祥。其應亦速。而後世弗深考經旨。傳注怪詭禘禘。併爲一談。至北齊妃嬪參饗。黷而不蠲。去禮逾遠矣。履按蘓洵曰。吞卵履跡。皆出于史記。馬遷蓋因玄鳥生民之詩耳。而毛公之

傳以玄鳥降爲祀郊禘之候。履帝武爲從高辛之行。及鄭之箋而後有吞踐之事。當毛之時。未始有遷史也。遷之說出于疑詩。而鄭之說則起于信遷矣。宋徽宗時。配以高辛氏而簡狄姜源。皆從祀。豈非惑于馬鄭之說耶。

蜡祭

禮記曰。伊耆氏始爲蜡。蜡者。索也。歲十二月。合聚萬物而索饗之也。天子大蜡八。鄭玄注云。先嗇一。司嗇二。農三。郵表畷四。猫虎五。坊六。水庸七。昆蟲八。王肅則分猫虎爲二。不數昆蟲。沙隨程氏曰。先儒謂昆蟲害稼。不當祭。乃易以百種。是不然。所謂昆蟲者。祭其除昆蟲而有功于我者也。非祭昆蟲也。陳祥道曰。蜡之爲祭。所以報本反始。息老送終也。其服。王玄冕而

有司皮弁素服。葛帶榛杖。其牲體醢辜。其樂六樂。而奏六變。吹豳頌。擊土鼓。舞兵舞。帔舞。其所致者。川澤山林。以至土示天神。莫不與焉。則合聚萬物而饗之者。非特八神也。而所重者八。以其尤有功于田故也。履按月令。孟冬天子祈來年于天宗。大剗祠于公社。及門閭臘先祖五祀。鄭注曰。此周禮所謂蜡祭也。則臘亦謂之蜡矣。蔡邕獨斷。四代臘之別名。夏曰嘉平。殷曰清祀。周曰大蜡。漢曰臘。蜡與臘固一也。而注疏

復以郊特牲言皮弁素服而祭。又言黃衣黃冠而祭。則祭之服不同。月令言祈來年于天宗。割祠于公社。又言臘先祖五祀。則祈臘之名不同。于是謂皮弁素服而祭。與祈來年于天宗。蜡也。黃衣黃冠而祭。與臘先祖五祀。臘也。蜡以息老物。臘以息民。息民固在蜡後矣。此記所以言旣蜡而收民息已也。周蜡於十二月。左傳晉侯以十二月滅虢。遂襲虞。宮之奇曰。虞不臘矣。則臘蜡同月。孔穎達曰。蜡臘有別。總其義俱名

蜡也。又曰。月令。在祈天宗之下。但不知臘與蜡祭相去幾日。准隋禮及今禮。皆蜡之後日。今按開元禮曰。臘日蜡百神。則臘蜡同日矣。宋以戌日爲臘。以七日辛卯蜡百神。和峴議曰。蜡始于伊耆。後歷三代及漢。其名雖改。而臘與蜡其實一也。漢火行用戌臘。臘者。接也。新故相接。咬取禽獸以饗百神。報終成之功也。王者因蜡祭。上饗宗廟。傷及五祀。展其孝心。盡物示恭也。魏晉以降。悉沿其制。唐乘土德。正觀之際。以

前寅日蜡百神。卯日祭社官。辰日饗宗廟。開元定禮三祭皆於臘辰。以應土德。聖朝常以十二月戌日爲臘。而以七日辛卯先行蜡祭。蓋禮官之失也。玉燭寶典曰。蜡者報百神。臘者祭先祖。同日而異祭也。禮書曰。古者臘有常月。而無常日。祖在始行而無常時。由漢以來。溺于五行之說。高堂隆謂盛日爲祖。衰日爲臘。其失先王之禮遠矣。後周兼五天帝。五人帝與百神而蜡於五郊。唐不祭五天帝。五人帝。特蜡百神于

南郊。而闕其方之不登者。然蜡因其順成之方。以報神。因其州之序。以樂民。則唐一於南郊。非也。蜡及天宗。則日月星辰之類而已。後唐兼天帝而祭之。亦非也。明禮于四孟享廟。戶竈中霤門井。分五時。又于歲暮享廟。命太常少卿兼祭五祀于太廟丹墀。蓋本月令臘享五祀也。蜡祭缺焉。

五祀

五祀見于周禮。禮記儀禮雜出于史傳多矣。特祭法

以司命。中霤。國門。國行。泰厲。戶竈。爲七祀。

鄭注司命。督察三命。

中霤。主堂室居處。門戶主出入。行主道路。行作。厲主殺罰。竈主飲食之事。疏曰。司命者。宮中小神。熊氏曰。非天之司命也。皇氏曰。司命者。文昌宮星。其義非也。泰厲者。謂古帝王無後者也。此鬼無所依歸。好爲民作禍。故而左傳見昭二年。家語五帝篇。則以五祀爲重該祀之。

修熙黎勾龍之五官。馬融主之。月令以五祀爲門行

戶竈。中霤。白虎通劉昭范曄高堂隆之徒。以五祀爲

門井戶竈中霤。鄭氏釋大宗伯之五祀。則用左傳家語之說。釋小祝之五祀。則用月令之說。釋王制之五祀。則用祭法之說。然則所謂五祀者。其名雖同。其祭各有所主。七祀之制。不見他經。鄭氏以七祀爲周制。五祀爲商制。然周官雖天子亦止于五祀。儀禮雖士亦五祀。則五祀無尊卑隆殺之數矣。祭法自七祀推而下之。至于適士二祀。庶人一祀。非周禮也。陳祥道曰。門戶。人所資以出入者也。中霤。人所資以居者也。

竈井人所資以養者也。先王之于五者。不特所祀如此。而又事有所本。制度有所興。此所以祀而報之也。中霤。土之所用事。故祀于中央。竈。火之所用事。故祀于夏。井。水之所用事。故祀于冬。戶在內而奇。陽也。故祀于春。門在外而偶。陰也。故祀于秋。兩漢魏晉之立五祀。井皆與焉。特隋唐參用月令祭法之說。五祀祭行。及李林甫之徒。復修月令。冬亦祀井而不祀行。然則行神亦特載於始行而已。非先王冬日之常祀也。

通典曰。五行之官。祭于門。戶行竈中雷。中雷。土神也。火正祀竈。而水正不祀井。非其類也。禮記。王七祀。諸侯五。大夫三。冬祀行。記之誤也。井不輕于竈。行不唯冬。白虎通云。祀井是也。傳玄曰。七祀五祀。月令皆云。祀行而無井。先儒有直作井者。旣祭竈而不祭井。於事則有闕。於情則不類。謂之井者。近是。按宋之七祀。全用祭法。朱子曰。行堂塗也。古人無廊屋。只于堂陛之下。取兩條路。五祀雖分四時。然出則獨祭行。程子

曰五祀恐非先王之典。報則遺其重者。井。人所重。行。寧廊也。其功幾何。楊慎曰。井。卽行也。行者。井間道。八家同井。井有八道。八家所行也。馬端臨曰。按古者雖有五祀七祀。而不言其所祭之地。然以七者觀之。獨司命與厲。當有祭之之所。若中霤。若門。若戶。若行。若竈。則所祭之神。卽其地也。祭法言王及諸侯。立門行二祀。則曰國門。國行。大夫士。則曰門。曰行而已。竊謂有國者祀此二神。則當於國門祭之。而大夫以下。則

當在其家之門首。至若中雷戶竈。則凡居室皆有之。皆可祀於其地。義或然也。而隋唐乃祀之於太廟。以時享祖宗之時。并祭之。蓋本鄭康成之說。然康成注禮記月令。其祀戶條下。則言凡祭五祀於廟。注周禮宮正。凡邦之事。蹕條下。則言邦之祭社稷七祀於宮中。而正義則謂於廟者。殷禮。於宮者。周禮。蓋康成解經。於制度之不脗合處。則以爲或殷禮。或周禮。今鄭注自爲異同。而正義所以釋之者。亦復如是。皆臆說。

也。然二說之中。宮中之義爲優。蓋此五祀者。皆人生日用起居之所係。故當卽宮居而祭之。若廟。則所以崇奉祖宗。不當雜祭他鬼神於其地。如門中雷廟。亦有之。因時享而并祀於其地。猶云可也。至於若司命。若竈。若行。則於廟何關。又王之所祀。泰厲。乃帝王之無後者。蓋非我族類也。今卽太廟之中。爲位而祭之。得毋有相奪予享之患乎。履按朱文公家禮。不載五祀。丘文莊特補竈祀。有祝文。以歲暮舉行。因于俗也。

會典亦無大夫祭五祀之禮。惟天子及王國祀之。立春祀戶于宮門外。道左西向。立夏祀竈于大庖前。中道南向。季夏土王後戊日。祀中霤于奉天殿外。文樓前。西向。立秋祀門于午門外。西角樓東向。立冬祀井于大庖前。南向。可謂得宜。但祭則遣內臣。王國正月。初四祭戶。四月初一祭竈。六月戊日祭中霤。七月初一祭門。十月初一祭井。亦遣官也。餘冬錄云。古者祭必屏刑人。今制陪祭官。刑喪等項有禁。大祀天地內。

臣避之。以其人經刑。形體不全故也。而四孟及季夏五祀之祭。乃用內臣行事。國家每有興作。俱命內官監。內臣致祭。不知刀鋸之餘。何以交神明。掌兵刑官尚嫌不使與祭。而親經刑者主祭焉。豈非不可之大

者乎。又鄭玄注月令祀竈。引禮器竈者。老婦之祭。謂祭先炊之人。杜佑信之。按許慎曰。竈者王者所祭。古之有功德于人者。非老婦也。蓋食竟而祭。爨神宗婦祭。僎費烹者祭。養爨孔子譏臧文仲之失禮。爲盆瓶老婦之所祭。非祭老婦也。豈有帝王五祀大禮而祭一婦人乎。東觀漢記。遂有附會陰氏之說。可笑也。又按月令春祀戶。祭先脾。秋祀門。祭先肝。鄭冲云。此順氣所宜。藏所值耳。而漢唐亦未有分用脾肝于

俎之說。至宋元豐始行之。通典曰。五祀者。所以報德也。夫以天子舉報德之祭。而俎僅一脾。毋乃以少爲貴乎。明則皆祭以少牢。不取呂說也。

類禱

陳祥道曰。詩曰。是類是禱。爾雅曰。類禱。師祭也。王制。禱於所征之地。公羊曰。甲兵祠兵。小宗伯。凡王之會同。軍旅。甸。役之禱祠。肄儀爲位。肄師。凡四時之大田。獵祭表貉。讀爲千百之百。於所立表之處。爲師祭造軍法者。禱氣勢之增倍也。其神蓋蚩尤。或曰黃帝。甸祝掌四時之田表貉之祝號。大司馬中春教振旅。有司表貉。誓民鼓遂圍禁。中冬教大閱。旣陳。乃設驅逆。

之車。有司表貉于陳之前。漢書稱高祖祠黃帝蚩尤於沛庭。先儒或以蚩尤爲天子。或以爲庶人。其詳不可以考。然管仲稱蚩尤作劒戟。史記稱黃帝與蚩尤戰於阪泉。蓋軍法之興。始於此也。故後世祭之。周官言貉。詩與禮記爾雅言禡。其實一也。貉之祭。蓋使有司爲之而立表於陳前。肆師爲位。甸祝掌祝號。既事。然後誓衆而師田焉。周官所謂表禡誓民是也。古者將射。則祭侯。將卜。則祭先卜。將用火。則祭燿。將用馬。

則祭馬祖。然則將師田而祭者。不特爲禱而已也。唐制。禡祭爲壇壝。設瘞埴。皇帝齋於行宮。從官齋於軍幕。置甲冑弓矢於神座之側。建稍於神座之後。而牲幣犧象。皆有儀度。然古人祭於立表之處。則無壇壝。其置甲冑弓矢於神座之側。建稍於神座之後。理或有之。司几筵甸役。則設熊席。右漆几。鄭氏以爲祭貉之禮。誤也。馬貴與曰。按昔天子之征伐也。出則類禡。入則振旅。皆有事于天地祖宗。其禮至不輕也。自漢

而後。只于平時教閱之際。行講武之祭。至若征伐。則無治兵振旅之禮矣。

古今釋疑卷之五終